



## Kerajaan Perpaduan letak negara di trajektori tepat - KSN

Disember 1, 2023 @ 12:41pm

PUTRAJAYA: Berikut adalah antara petikan wawancara Ketua Setiausaha Negara (KSN), Tan Sri Mohd Zuki Ali, sempena setahun Kerajaan Perpaduan pimpinan Perdana Menteri, Datuk Seri Anwar Ibrahim, menerajui pentadbiran Malaysia.

**SOALAN:** Bagaimana Tan Sri melihat pencapaian Kerajaan Perpaduan pimpinan Perdana Menteri, Datuk Seri Anwar Ibrahim, dalam setahun pentadbiran?

**JAWAPAN:** Setelah setahun pentadbiran, kerajaan telah meletakkan negara di trajektori yang tepat bagi terus membangun sebagai sebuah negara maju.

Perdana Menteri banyak menekankan isu dan perkara 'fundamental' (asas). Perdana Menteri dalam ucapan-ucapannya juga banyak menekankan keperluan untuk memiliki tatakelola pentadbiran yang amanah dan berintegriti.

**SOALAN:** Selaku Setiausaha Jemaah Menteri, apakah perkara yang sering ditekankan Perdana Menteri, Datuk Seri Anwar Ibrahim, ketika mempengerusikan mesyuarat Kabinet?

**JAWAPAN:** Perdana Menteri sering menekankan kepentingan untuk mempercepatkan pelaksanaan dasar dan projek pembangunan yang membabitkan perkara asas rakyat.

Sebagai contoh, mempercepatkan pelaksanaan sekolah daif dan projek tandas di sekolah-sekolah. Dalam mesyuarat Jemaah Menteri, Perdana Menteri akan menyentuh isu 'fundamental'.

**SOALAN:** Apakah perubahan-perubahan yang dibawa Perdana Menteri, Datuk Seri Anwar Ibrahim, dalam perkhidmatan awam?

**JAWAPAN:** Perdana Menteri memberi kepercayaan tinggi kepada penjawat awam. Apabila orang nombor satu percaya kepada keupayaan penjawat awam, kita rasa selesa untuk menjalankan tugas.

Berkaitan pelantikan konsultan, Perdana Menteri selalu kata kita (penjawat awam) ada keupayaan untuk melaksanakan tugas (sebagai konsultan), jadi diberikan kita peranan untuk membangunkan negara. Apa juar pandangan penjawat awam, akan dihargai dan diminta pandangan. Itu yang saya lihat satu perkara besar dibawa.

**SOALAN:** Mengenai aspirasi MADANI, apakah peri pentingnya setiap nilai dan aspirasi dalam MADANI digarap serta diterjemahkan dalam perkhidmatan awam?

**JAWAPAN:** Perdana Menteri amat menitikberatkan budaya kerja berdasarkan nilai MADANI. Kalau kita melihat maksud MADANI, ia memfokuskan kepada usaha membina masyarakat yang maju dari segi pemikiran, kerohanian serta pembangunan.

Perdana Menteri telah menggagaskan nilai MADANI meliputi keMampanan, kesejAhteraan, Daya cipta, hormAt, keyakiNan dan lhsan.

Saya telah membawa visi The G.R.E.A.T Civil Service yang merujuk kepada 'Good governance' (Tadbir urus bagus), 'Responsibility' (Tanggungjawab), 'Empathy' (Empati), 'Accountability' (Akauntabiliti) dan 'Tenacity of purpose' (Fokus kepada matlamat). Visi ini bertujuan menyokong nilai MADANI untuk dilaksanakan dalam perkhidmatan awam.

Saya telah diberi amanah untuk mengetuai Pasukan Petugas Khas Reformasi Agensi atau STAR yang dianggotai oleh ketua setiausaha (KSU) dan ketua pengarah (KP).

Kita telah mengetengahkan inovasi pentadbiran, iaitu ketua projek inisiatif STAR dipilih dalam kalangan pegawai kanan di kementerian atau jabatan berbeza berbanding kementerian/jabatan pemilik inisiatif.

Menerusi kaedah ini, tatakelola pentadbiran dapat diurus dengan pandangan lebih menyeluruh dan holistik, tembok silo dapat diruntuhkan serta menyemarakkan lagi 'sense of belongings' (rasa kekitaan) dalam kalangan penjawat awam. – BERNAMA